

ՊԱԶՈՏՆՈՒ ՏՐՏՈՒՆՋԸ

Առաջ մեր գյուղում պաշտոնի մարդը
Իսկի չէր քաշում գյուղական դարդը,
Ո՛չ խարջ էր տալիս, ո՛չ մասրափ գիտեր,
Խարջի ավելն էլ դեռ ինքը կուտեր:

5 Ա՛խ, ինչպես լավ էր,
էն վախտ Շուլավեր:

Շրջվել է հիմի դարը հակառակ,
Պաշտոնի մարդն էլ ընկավ խարջի տակ,
Աստված վե՛ր կունի – պաշտոնի ու խա՛րջ,

10 Ո՞վ էր իմացել էս բանը առաջ –
Ա՛խ, առաջ լավ էր,
Ափսո՛ս Շուլավեր:

Պաշտոնու եզը, գոմեջը թե ձին
Թեկուզ հենց քանդեր քյասիբի այգին,

15 Ո՞վ կհամարձակեր պահանջել տուգանք –
Այնքան ունեինք պատիվ ու հարգանք –
Ա՛խ, ինչպես լավ էր,
<էն վախտ Շուլավեր:>

Հիմի թե հորթ է, պատահի այնպես,

20 Ընկնի մի հիմար աղքատի պարտեզ.
– Հէ՛յ, ինչո՞ւ մարդին տալիս ես վնաս,
Դե՛, սխրտ, դու սրան ի՛նչպես դիմանաս –
Ա՛խ, էս ինչ ցավ էր,
<Ափսո՛ս Շուլավեր:>

25 Ամեն մարդ իրան գյուղցյումն էր պահում
Գինի էր առնում իր փողի շահում,

Մեծ էր թե ինչ որ – այն էր գյուղգյումը,
Ո՞վ դեմ կըխոսեր – թեկուզ մտքումը –
30 Ախ, ինչպես լավ էր,
<էն վախտ Շուլավեր: >

Հիմի աղքատի – հարուստի համար
Բերել են մի շափ շինել հավասար,
Վրան էլ գեղի պեշատն են զարկել,
Պետք է նրանով շիրա հավաքել:
35 էս ինչ նոր ցավ էր –
<Ափսոս Շուլավեր: >

Գեղի քյասիբին պապական ծեսով
Փող էինք տալիս 60 տոկոսով –
Դեռ խեղդում էինք պարտքերի տակին
40 Եվ հետո խլում տունը կամ այգին –
Ախ, ինչպես լավ էր,
<էն վախտ Շուլավեր: >

Ասում են հիմի զակոն է եկել,
Որ այս տեսակ բան թե անենք մեկ էլ`
45 Վինավաթ կըլնենք ու Սիբիր կերթանք.
Հապա էլ ինչո՞վ անենք աշխատանք –
Ախ, էս ինչ ցավ էր –
<Ափսոս Շուլավեր: >

Ախ, մի ժամանակ մեր ամբողջ գյուղը
50 Գիտեր պաշտոնու ահն ու երկյուղը –
Գիտեր, որ մենակ պաշտոնին էր մարդ,
Մյուսները նրան կամ ծառա, կամ պարտ.
Ախ, ինչպես լավ էր,
<էն վախտ Շուլավեր: >

55 Հիմի, Տեր Աստված, այս ի՞նչ է դառել,
Աղքատ և գյաղա լեզու են առել,
Խոսում են, վիճում, դատում, պահանջում –
Պաշտոնու հարգը էլ չեն ճանաչում –
Ա՛խ, էս ի՞նչ ցավ էր,
60 <Ափսոս Շուլավեր:>

Առաջ ժամանակ ամեն պաշտոնում
Պաշտոնի մարդ էր ընտրված լինում
Հարուստ ու դիրքով, մազով ու միրքով –
Գործն էլ տանում էր պաշտոնու կարգով.
65 Ա՛խ, ինչպես լավ էր,
<էն վախտ Շուլավեր:>

էնպես վախտի ենք հիմի պատահել –
Նոր ձվից ելած ամեն մի ջահել,
Որ գլխին ճերմակ մի մազ չունի դեռ
70 Դառնում է գեղի սուղիա-տանուտեր –
Ա՛խ, էս ի՞նչ ցավ էր,
<Ափսոս Շուլավեր:>